

Bilten

Oktobar 2023.
Izdanje br. 35



Općinski sud u Sarajevu
Општински суд у Сарајеву
Sarajevo Municipal Court

Općinskog suda u Sarajevu



Glavna Kantonalna tužiteljica Sabina Sarajlija posjetila Općinski sud u Sarajevu

U kabinetu predsjednika Općinskog suda u Sarajevu 29. maja 2023. godine održan je sastanak kojem su prisustvovali predsjednik suda Damir Batotić, predsjednik krivičnog odjeljenja i zamjenik predsjednika suda Denis Kurtović, glavna tužiteljica Kantonalnog tužilaštva KS Sabina Sarajlija te njen zamjenik Hrvoje Čabrajić. Tokom posjete razgovarano je o potpisivanju Memoranduma o saradnji,

a kojeg bi u okviru projekta “Jačanje kapaciteta pravosuđa-komponenta unaprjeđenje rada krivičnih odjeljenja sudova i upravljanja krivičnim postupcima“, u narednom periodu trebali potpisati predsjednici Općinskog i Kantonalnog suda u Sarajevu te glavna kantonalna tužiteljica Kantonalnog tužilaštva KS. U kontekstu navedenog, razgovarano je o unaprjeđenju saradnje suda i tužilaštva za koju je zajednič-

ki ocijenjeno da je na zadovoljavajućem nivou, ali i da ima mjesta njenom napretku. Tokom posjete učesnici sastanka su razgovarali i o pitanjima organizacione prirode i to u složenim predmetima kao i predmetima sa većim brojem osumnjičenih, odnosno optuženih te je zaključak da ovakvi sastanci doprinose efikasnijem radu pravosudnih institucija u Kantonu Sarajevo. ■



Pripadnici Maršalske službe Sjedinjenih Američkih Država u posjeti Sudskoj policiji FBiH

U sklopu dolaska u Bosnu i Hercegovinu radi prisustva konferenciji na temu “Sudska policija u sistemu sigurnosti i međuagencijska saradnja u funkciji jačanja pravosuđa”: stanja i perspektive, 11. oktobra 2023. godine Sudsku policiju u Federaciji Bosne i Hercegovine posjetili su pripadnici Maršalske službe Sjedinjenih Američkih Država, i to glavni inspektori g. Alex Stacy i g. Joe Gibboni, zajedno sa predstavnikom Ureda za međunarodnu borbu protiv narkotika i provedbu zakona Ambasade Sjedinjenih Američkih Država u Bosni i Hercegovini (INL), g. James Treacy-m.

Imenovani su se tokom posjete Sudskoj policiji sastali sa direktorom Sudske policije g. Dženadom Grošom koji je iste upoznao sa nadležnostima, organizacijom i izazovima sa kojima se u svom radu susreće Sudska policija u Federaciji Bosne i Hercegovine, te se razgovaralo o potrebama Sudske policije za jačanje kapaciteta i shodno tome mode-

lima buduće saradnje i podrške koju bi u obuci i drugim oblicima pomoći i podrške Ambasada Sjedinjenih Američkih Država u BiH i Maršalska služba Sjedinjenih Američkih Država mogli pružiti Sudskoj policiji u Federaciji Bosne i Hercegovine.

Navedenom sastanku su prisustvovali i pomoćnik direktora za operativne poslove i koordinaciju g. Edin Vehabović i šef Kabineta direktora g. Mahir Smailbegović.

Nakon posjete Sjedištu Sudske policije imenovani pripadnici Maršalske službe su u drugom dijelu dana zajedno sa direktorom Grošom posjetili Centar sudske policije u Kantonu Sarajevo, gdje je istim od strane g. Mirze Bibera, načelnika navedenog centra prezentiran rad navedenog centra sudske policije koji pored ostalih poslova, u okvirima svojih nadležnosti primarno opslužuje pravosudne institucije u Kantonu Sarajevo.

Navedenom sastanku prisustvovao

je i predsjednik Općinskog suda u Sarajevu g. Damir Batotić koji je prisutne upoznao sa radom suda i sigurnosnim izazovima sa kojima se svakodnevno susreće ovaj najveći sud u Bosni i Hercegovini.

Također, u okvirima navedene posjete imenovani su od strane g. Samira Tabakovića, načelnika Jedinice za sigurnost i zaštitu Sudske policije upoznati i sa radom i izazovima u radu Jedinice za sigurnost i zaštitu Sudske policije koja je primarno nadležna za sigurnost i zaštitu sudija i tužilaca, te zaštitu svjedoka pred pravosudnim institucijama u Federaciji Bosne i Hercegovine. Tokom službene posjete, a u znak zahvalnosti za podršku u organizaciji i učešću pripadnika Maršalske službe i INL-a na konferenciji koja je dana 10.10.2023. godine održana u povodu obilježavanja Dana sudske policije, direktor Sudske policije je imenovanim uručio zahvalnice sa značkom Sudske policije u Federaciji Bosne i Hercegovine. ■



Efikasnost izvršnog postupka i unapređenje rada sudskih izvršitelja neke od tema sastanka održanog sa predstavnicima komunalnih preduzeća u Kantonu Sarajevo

Akcionim planom mjera i aktivnosti za unapređenje naplate komunalnih usluga, a koji je usvojila Vlada Kantona Sarajevo, kao i mjerama i aktivnostima u okviru projekta ICCEA III koje Općinski sud u Sarajevu, kao pilot sud, provodi

u saradnji sa Visokim sudskim i tužilačkim vijećem BiH, predviđeno je održavanje periodičnih sastanaka sa predstavnicima javnih komunalnih preduzeća u Kantonu Sarajevo. Shodno navedenom, u Multimedijalnoj sali Općinskog suda u Sa-

rajevu 10. oktobra 2023. godine održan je sastanak predstavnika sarajevskog Općinskog suda i Toplana, Rad-a i Vik-a, kao komunalnih preduzeća koja imaju najveći broj predmeta na ovom sudu.

Teme sastanka bilo je unapređenje rada sudskih izvršitelja na terenu, a kroz saradnju sa komunalnim preduzećima, kao i unapređenje naplate i efikasnosti izvršnog postupka kroz pronalaženje efikasnijeg predmeta i sredstva izvršenja.

Na navedenom sastanku su usvojeni i zaključci čijom bi skorom realizacijom trebalo doći do znatnog unapređenja izvršnog postupka te smanjenja broja komunalnih predmeta koji godinama opterećuju ovaj sud.

Sastanak je održan na inicijativu Općinskog suda u Sarajevu. ■



▲ Predstavnice komunalnih firmi



Novoimenovane sutkinje Općinskog suda u Sarajevu stupile na dužnost

Visoko sudsko i tužilačko vijeće Bosne i Hercegovine (VSTV BiH) je na sjednici održanoj 06. i 07. septembra 2023. godine u Sarajevu donijelo odluke o imenovanju nosilaca pravosudnih funkcija u Bosni i Hercegovini. Tom prilikom imenovane su i sudije Općinskog suda u Sarajevu i to:

- Aleksandra Kolašinac,
- Anida Saračević,
- Nermina Hadžiomerović,
- Sellma Ćemalović

Damir Batotić, predsjednik suda, održao je 02.10.2023. godine kraći sastanak sa novoimenovanim sutkinjama, a povodom njihovog stupanja na dužnost. Istom su prisustvovali i Senada Smajiš, sekretar suda te Mirzet Sudžuka, šef Sektora sudske uprave.

Predsjednik je sutkinjama poželio sreću i uspjeh u budućem radu te ih ukratko informisao o radu Općinskog suda, o trenutnim aktivnostima te ih obavijestio na kojim će referatima biti raspoređene. Inače, pri donošenju odluke o imenovanju na poziciju sudije VSTV BiH je uzeo u obzir kriterije poput: stručnog znanja, radnog iskustva i radnih rezultata; stručne sposobnosti zasnovane na dosadašnjim rezultatima u karijeri; sposobnosti da

nepriistrano, savjesno, marljivo, odlučno i odgovorno obnaša dužnosti u okviru funkcije za koju se prijavljuje; odnosa sa radnim

kolegama, ponašanja van posla, profesionalne nepristranosti, ugleda i iskustva na rukovodećim poslovima. Pri imenovanju, VSTV BiH primjenjuje odgovarajuće ustavne odredbe kojima se uređuju

jednaka prava i zastupljenost konstitutivnih naroda i ostalih te poštuje ravnomjernu zastupljenost spolova. ■



Održan sastanak sa predstavnicima Regionalne advokatske komore Sarajevo

Na inicijativu Upravnog odbora Regionalne advokatske komore (RAK) Sarajevo, u Multimedijalnoj sali Općinskog suda u Sarajevu 26. septembra 2023. godine održan je sastanak Damira Batotića, predsjednika suda, sa predstavnicima Upravnog odbora RAK-a.

Sastanak je održan s ciljem razmatranja postojeće saradnje suda i advokata te iznalaženja zajedničkih rješenja za probleme sa kojima se suočavaju u radu. Iako su im u sudskim procesima uloge različite, i sudije i advokati imaju zajedničke ciljeve, a to je efikasno rješavanje sudskih predmeta, postizanje pravde te zadovoljstvo krajnjih korisnika-stranaka.


Neke od tema o kojima se razgovaralo na sastanku odnosile su se na inicijativu za izmjene i dopune Zakona o krivičnom postupku Fede-

racije Bosne i Hercegovine, ujedinjavanje sudske prakse prilikom postavljanja branilaca po službenoj dužnosti te rada ZK ureda i Odjeljenja registra za upis pravnih lica kada je riječ o zahtjevima advokatima. Istaknuta je i važnost redovnog održavanja ovakvih zajedničkih sastanaka kako bi se ne samo unaprijedila postojeća saradnja već i kako bi se blagovremeno uočili određeni problemi te poduzeli adekvatni koraci na promptnom rješavanju istih.

Zaključak predstavnika Upravnog odbora RAK-a je da je postojeća saradnja sa Općinskim sudom u Sarajevu zadovoljavajuća te je na sastanku razgovarano o konkretnim načinima unaprjeđenja iste.

Osim predsjednika suda, sastanku su prisustvovali i Denis Kurtović, predsjednik Krivičnog odjeljenja suda,

Ramiza Aganović, predsjednica Odjeljenja registra za upis pravnih lica, Ekrem Tošić, šef ZK ureda te Mirzet Sudžuka, šef Sektora sudske uprave. ■





Unapređenje efikasnosti i kvaliteta krivičnih postupaka u fokusu saradnje VSTV-a BiH i međunarodnih partnera

Intenzivnija međuinstitucionalna saradnja jedan je od osnovnih preduslova za unapređenje efikasnosti i kvaliteta krivičnih postupaka, zaključak je sastanaka međunarodnog ekspertnog tima i predstavnika VSTV-a BiH sa sudovima i tužilaštvima u Bijeljini, Zenici i Sarajevu, te predstavnicima advokatske zajednice.

Tokom sastanaka su analizirani rezultati primjene dokumenata koji su prethodno izrađeni s ciljem unapređenja međuinstitucionalne saradnje, kao i alata sačinjenih u svrhu efikasnog vođenja predpretnog ročišta i osiguranje procesne discipline stranaka u krivičnom postupku.

Poseban akcenat bio je i na temama kao što su potvrđivanje optužnica i zakonitost dokaza, obzirom da bi se, prema mišljenju struke, unapre-



đenjem istih moglo značajno utjecati na cjelokupno unapređenje krivičnog postupka.


Sastancima su prisustvovali članovi međunarodnog ekspertnog tima koji čine sudije iz Norveške i Nizozemske, predstavnici projektnog tima Jačanje kapaciteta pravosuđa

koji se implementira od strane Sekretarijata VSTV-a BiH i predstavnika pravosudnih institucija - prvostepenih i drugostepenih sudova, te tužilaštava kao partnera Projekta, sa područja Bijeljine, Zenice i Sarajeva, kao i predstavnici Advokatskog zbora Bijeljine. ■



Održan sastanak sa predstavnicima Projekta EU4Justice - II

Na zahtjev predstavnika Projekta EU4Justice – faza II, 11. septembra 2023. godine, u kabinetu predsjednika Općinskog suda u Sarajevu Damira Batotića, održan je sastanak kojem su, pored predsjednika Batotića, prisustvovali Helena Papa, šefica projekta EU4Justice, Jorge Orbach Martinez, sudija iz Španije i lider komponente 1 ovog Projekta, Borja Jimenez Munoz, tužilac iz Španije i ekspert angažovan na Projektu unutar komponente koja se odnosi na efikasnost rada sudova, Katica Artuković, predsjednica Kantonalnog suda u Širokom Brijegu, nacionalna eksperti-



ca angažovana na Projektu, te Lana Šahman, nacionalna pravna savjetnica.

Predstavnici Projekta istakli su da je glavni fokus Projekta borba protiv korupcije i organizovanog kriminala u BiH kroz četiri komponente na čijem provođenju će biti angažovani međunarodni i nacionalni eksperti. Obzirom da se Komponenta 1 – Osnaživanje kapaciteta pravosuđa za monitoring i evaluaciju tiče unapređenja rada sudova i pravosuđa u cjelini, predstavnici Projekta pokazali su veliki interes za organizaciju rada Općinskog suda, zaostatke u radu te probleme sa ko-

jima se sud susreće. Predsjednik suda je prisutne upoznao sa različitim organizacionim aktivnostima koje su se provodile te aktivnostima koje su planirane u narednom periodu u Općinskom sudu u Sarajevu, a čiji je krajnji cilj uspostava standarda u postupanju koji se primjenjuju u naprednim pravnim sistemima.

Predstavnici Projekta zahvalili su se predsjedniku suda na prijemu, te izrazili nadu da će uspješno saradivati i u narednom periodu, dodavši da su stekli korisne informacije koje će im znatno pomoći u radu na Projektu. Obzirom da će u okviru Projekta također saradivati sa manjim sudovima, imat će priliku uporediti organizaciju rada najvećeg suda u BiH sa sudovima koji imaju mnogo manji broj sudija i predmeta u radu. ■



Rješavanje problema energetske efikasnosti Palate pravde od velikog značaja za sve institucije smještene u njoj

U prostorijama Općinskog suda u Sarajevu 13. septembra 2023. godine održan je sastanak na temu energetske efikasnosti Palate pravde. Osim Damira Batotića, predsjednika suda, te Mirzeta Sudžuke, šefa Sektora sudske uprave, sastanku su prisustvovali i Darja Softić Kadenić, ministrica pravde i uprave Kantona Sarajevo, Vladimir Špoljarić, predsjednik Kantonalnog suda u Sarajevu, prof. dr. Tarik Zaimović, prorektor za finansije Univerziteta u Sarajevu te arhitekta Adnan Balavac, savjetnik u VSTV-u BiH za strateško planiranje materijalnih resursa.

Učesnici sastanka razgovarali su o aktivnostima koje je potrebno poduzeti na izradi investiciono-teh-



ničke dokumentacije kao i projektne dokumentacije za zamjenu vanjske stolarije i ugradnje sistema klimatizacije u zgradi Palate pravde, a u kojoj su smješteni sarajevski Kantonalni i Općinski sud, Univerzitet u Sarajevu te Pravni fa-

kultet Univerziteta u Sarajevu. Zamjena vanjske stolarije na Plati pravde rezultirala bi poboljšanjem uslova rada, ali i povećanjem energetske efikasnosti jer bi se znatno smanjili režijski troškovi svih institucija smještenih u Palati pravde. ■

Predsjednik Kantonalnog suda u Sarajevu u redovnoj kontroli rada sarajevskog Općinskog suda

Vladimir Špoljarić, predsjednik Kantonalnog suda u Sarajevu, 26. juna 2023. godine, posjetio je Općinski sud u Sarajevu u okviru redovne kontrole rada. Tom prilikom su na sastanku sa Damirom Batotićem, predsjednikom Općinskog suda u Sarajevu, razmotrene brojne teme koje se odnose na organizaciju rada suda za period prvih šest mjeseci tekuće godine. Također, predsjednik Općinskog suda u Sarajevu je tom prilikom informisao predsjednika Špoljarića i o organizacionim promjenama koje su se u prethodnom periodu provodile i još uvijek provode u sudu, te o plani-



ram aktivnostima za naredni period. U tom pravcu dogovorena je međuinstitucionalna saradnja kada je u pitanju usklađivanje sudske prakse u predmetima koji se vode u ovom sudu. Sastanku su prisustvovali i Mediha Gagrica - pomoćnica predsjednika Kantonalnog suda u

Sarajevu za opće i pravne poslove, upisnike i pomoćno-tehničke poslove, Mirzet Sudžuka šef Sektora sudske uprave Općinskog suda u Sarajevu te Muris Lončarević šef Odsjeka za upravljanje predmetima u Općinskom sudu u Sarajevu. ■

Faris Dizdarević, stručni saradnik Općinskog suda u Sarajevu, prisustvovao Master Class-u na temu Međunarodnog krivičnog prava

Geoffrey Nice Fondacija je i ove godine u periodu od 01.07. do 08.07.2023. godine u prostorijama Inter Univerziteta u Dubrovniku održala master class na temu Međunarodnog krivičnog prava, a kojem je prisustvovao i stručni saradnik Općinskog suda u Sarajevu, Faris Dizdarević.

Ovogodišnji master class održan u Dubrovniku na temu "Accountability for War Crimes in Ukraine - What will work?" okupio je impresivnu listu predavača i sudionika iz različitih profesionalnih i akademskih sfera koji prakticiraju krivično i druge grane prava i srodnih društvenih nauka, kako bi razmotrili ključna pitanja odgovornosti za ratne zločine u Ukrajini, prisjećajući se lekcija naučenih iz prošlosti.

Neki od predavača bili su: Sir Geoffrey Nice, bivši tužitelj u Međunarodnom krivičnom tribunalu za bivšu Jugoslaviju (ICTY) i sudija u narodnom tribunalu za Ujgure i kineskom narodnom tribunalu; Lord Bonomy Ian – bivši sudija (ICTY); Prof.dr. Sunčana Roksandić, profesor krivičnog prava na Pravnom fakultetu Univerziteta u Zagrebu; Sir Conrad Schieman, bivši sudija Evropskog suda pravde; Prof dr. Turković Ksenija – sudija Evropskog suda za ljudska prava iz Hrvatske; Prof. Dr. Nevenka Tromp, profesor na Univerzitetu u Holan-




diji i dio istraživačkog tima tužioca Geoffrey Nice u postupku pred (ICTY) i mnogi drugi.

Predavači su govorili o svom iskustvu u radu kao sudije, tužioc i advokati u međunarodnim sudovima kao što su Međunarodni krivični sud (ICC), Evropski sud za ljudska prava (ECHR), Međunarodni krivični tribunal za bivšu Jugoslaviju (ICTY), a što je učesnicima pružilo priliku neposrednog izvora saznanja činjenica o funkcionisanju te pozitivnim, ali i negativnim stranama rada ovih međunarodnih tijela.

Tokom master class-a, predavači su podijelili svoja bogata iskustva, znanje i perspektive o međunarodnom krivičnom pravu, tranzicijskoj pravdi te utjecaju sudskih procesa na suočavanje s prošlašću i

pružanje pravde žrtvama. Program master class-a je bio izuzetno raznolik i obuhvatio je različite tematske blokove, kao što su Nürnbergski procesi, neformalne metode odgovornosti (poput narodnih tribunala i komisija za istinu), uloga Međunarodnog krivičnog suda te primjeri iz drugih ratnih sukoba iz prošlosti i masovnih zločina, poput Srebrenice i Indonezije. Također su razmatrani i primjeri narodnih tribunala poput Tribunala za Ujgure i Indonezijskog narodnog tribunala. Posebna pažnja posvećena je primjeni tih iskustava na kontekst dešavanja u Ukrajini i razmatrani su različiti pravni i politički izazovi koji se tiču odgovornosti za ratne zločine na tom području, te se govorilo i o ulozi UN-ovog Vijeća sigurnosti u procesu pravde i odgovornosti za ratne zločine.

Sudionici su imali priliku sudjelovati u grupnim vježbama i diskusijama, a što je doprinijelo razmjene ideja i stvaranju novih perspektiva u vezi sa suočavanjem s ratnim zločinima ■





Predstavници Projekta “Inicijativa u oblasti vladavine prava na Zapadnom Balkanu (WBROLI)” posjetili Općinski sud u Sarajevu

Christopher Marshall, tim lider Projekta “Inicijativa u oblasti vladavine prava na Zapadnom Balkanu (WBROLI)” i Polly Calvart, programskla direktorica GovRisk te Dalida Tanović, savjetnica na projektu „WBROLI“, posjetili su 01. juna 2023. godine Općinski sud u Sarajevu. Tom prilikom su se sastali sa sudijom Denisom Kurtovićem, predsjednikom Krivičnog odjeljenja Općinskog suda u Sarajevu i sutkinjom Krivičnog odjeljenja Ajlom Papović Mujan. Cilj posjete bila je razmjena informacija u vezi sa dosadašnjom saradnjom ovog suda sa Uredom za borbu protiv korupcije i upravljanje kvalitetom Kantona Sarajevo te kako bi se utvrdile potrebe suda u provedbi Zakona o prevenciji i suzbijanju korupcije u aspektu zaštite prijavitelja korupcije.

Sudija Kurtović je pozdravio prisutne te ukratko predstavio rad Krivičnog odjeljenja naglasivši da sudije ovog odjeljenja posebnu pa-

žnju posvećuju predmetima korupcije koji svakako imaju prioritet pri rješavanju. On je istakao da ovaj sud redovno saraduje sa Uredom za borbu protiv korupcije i upravljanje kvalitetom Kantona Sarajevo, ali da bi ta saradnja u narednom periodu mogla biti unaprijeđena.

Predstavnici Projekta “WBROLI” su predstavili Projekat te istakli da je isti fokusiran na borbu protiv teškog i organizovanog kriminala i korupcije. S obzirom da sudije Općinskog suda u Sarajevu sude u koruptivnim predmetima te su upoznati sa Zakonom o prevenciji i suzbijanju korupcije u Kantonu Sarajevo, na sastanku je dogovoreno da će u okviru navedenog Projekta u narednom periodu biti organizovane edukacije za sudije Parničnog i Krivičnog odjeljenja Općinskog suda u Sarajevu kako bi se unaprijedila primjena Zakona o prevenciji i suzbijanju korupcije u Kantonu Sarajevo u oblasti zaštite prijavitelja korupcije.

Projekat “Inicijativa u oblasti vladavine prava na Zapadnom Balkanu (WBROLI)” finansira Ujedinjeno Kraljevstvo u okviru Fonda za stabilnost i sigurnost. Projekat provodi Chemonics International u saradnji s Ministarstvom unutrašnjih poslova Ujedinjenog Kraljevstva (Home Office) i s Britanskim ambasadama širom Zapadnog Balkana.

U okviru svog djelovanja, “WBROLI” u Bosni i Hercegovini pruža podršku Uredu za borbu protiv korupcije i upravljanje kvalitetom Kantona Sarajevo na provedbi Zakona o prevenciji i suzbijanju korupcije u Kantonu Sarajevo. Od avgusta 2022. godine, Projekat je realizovao niz aktivnosti s Uredom, a koje su uključivale obuke zaposlenih i predstavnika institucija, izradu radnih procesa za različite oblasti koje pokriva Zakon, te unapređenje komunikacije Ureda s javnosti. ■

U Vladi Kantona Sarajevo održan sastanak u vezi sa problemom privremenog oduzimanja vozila u prekršajnom postupku

Na inicijativu Darje Softić Kadenić, ministricice Ministarstva pravde i uprave Kantona Sarajevo, 30.05.2023. godine održan je sastanak predstavnika izvršne vlasti u Kantonu Sarajevo, na čelu sa Nihadom Ukom, premijerom Kantona Sarajevo, te predstavnika Općinskog i Kantonalnog suda u Sarajevu, a u vezi sa aktuelnim problemom oduzimanja putničkih motornih vozila u prekršajnom postupku. Sastanak je održan u prostorijama Vlade Kantona Sarajevo, a zajednički zaključak prisutnih je bio da će policijski službenici MUP-a KS pristupiti privremenom oduzimanju putničkih motornih vozila te su u tom pravcu na sastanku otklonjena neslaganja u načinu privremenog oduzimanja vozila.

Također, jedan od zaključaka je i da će ministrica Ministarstva prav-

de i uprave KS uputiti Federalnom ministarstvu pravde prijedlog za hitno donošenje provedbenih podzakonskih akata propisanih članom 105., stav 8. Zakona o prekršajima FBiH, a koje je trebalo donijeti u roku od 6 mjeseci od stupanja na snagu navedenog Zakona koji je donesen 06.08.2014. godine, dakle prije devet godina, a to je svakako moglo utjecati na prevenciju navedenog problema.

Općinski sud u Sarajevu je još 04.11.2016. godine uputio Ministarstvu pravde BiH, Ministarstvu sigurnosti BiH i Visokom sudskom i tužilačkom vijeću BiH Prijedlog za hitno pristupanje izmjenama i dopunama odredbi člana 234.a i 235. Zakona o osnovama bezbjednosti saobraćaja na putevima u BiH (ZOOBS), predlažući uvođenje zaštitne mjere oduzimanje predmeta izvršenja prekršaja, od-

nosno vozila kojim je prekršaj učinjen. U prethodnom periodu prijedlozi koji su dolazili od strane Općinskog suda u Sarajevu i MUP KS, a u vezi sa izmjenama i dopunama ZOOBS-a, nisu nailazili na razumijevanje.

Naposlijetku, učesnici sastanka će u narednom periodu zahtijevati da se u radnu grupu za izmjene ZOOBS-a uključe i predstavnici Općinskog suda u Sarajevu, odnosno sudije Prekršajnog odjeljenja tog suda, te da se pokrenu procedure za izmjene Zakona o prekršajima FBiH, a koji bi na adekvatan način propisao postupanja u prekršajnom postupku, na što su predstavnici Općinskog suda u Sarajevu prethodno i ukazivali.

Na održanom sastanku postignut je visok stepen saglasnosti između učesnika sastanka u pogledu rješavanja navedenih problema. ■



Premijer Uk i ministri s predsjednikom Općinskog suda: Važni iskoraci napravljeni, ima prostora za brže i efikasnije usluge prema građanima

Premijer Kantona Sarajevo Nihad Uk, ministrica pravde i uprave Darja Softić-Kadenić i ministar finansija Emir Dedović 24. maja 2023. godine razgovarali su s predsjednikom Općinskog suda u Sarajevu Damirrom Batotićem o temama važnima za građane Kantona Sarajevo koje su u ingerenciji ovog suda. Jedna od njih je digitalizacija arhiva Suda, uz ocjenu da su dosadašnji poduzeti koraci u tom pravcu značajni, ali da trebaju biti, zbog interesa građana našeg kantona, nastavljeni bržom dinamikom, posebno zbog toga što bi to doprinijelo boljem funkcioniranju ove djelatnosti Suda.

Rekonstrukcija šalter sale Zemljišnoknjižnog ureda i unapređenje njegovog rada bile su također teme ovog sastanka, jer je njegovo funkcioniranje posebno važno u olakšavanju pristupa građanima ovim podacima, uz smanjenje gužvi i omogućavanja kupovine taksi na licu mjesta.


„Proces dobijanja ovih podataka i informacija vezanih za zemljišnoknjižne izvode već godinama je prepoznat kao ‘usko grlo’ u funkcioniranju ove djelatnosti Suda. Svjesni smo da se procedure ubrzavaju

i olakšavaju, ali smatramo da ima prostora da ovu servisnu uslugu, koja je važna za mnoge naše sugrađane, učinimo lakšom, bržom i efikasnijom. To ćemo u narednom periodu i učiniti“, poručio je premijer Uk.

Zajednički stav svih učesnika sastanka je da su obim poslova i ingerencije ovog suda zaista velike, kao i da se radi o jednom od najpropulzivnijih sudova u državi ali i u regionu, zbog čega je nužno proširenje njegovih kapaciteta, a sve ciljem postizanja njegovog efektivnijeg rada. ■

Vijest preuzeta sa portala Vlade KS <https://vlada.ks.gov.ba/aktuelnosti/novosti/premijer-uk-i-ministri-s-predsjednikom-opcinskom-suda-vazni-iskoraci>






Sa predstavnicima MMF-a održan sastanak na temu rada Odjeljenja registra za upis pravnih lica

U Kabinetu predsjednika Općinskog suda u Sarajevu 17. maja 2023. godine održan je sastanak sa predstavnicima misije Međunarodnog monetarnog fonda (MMF) - Adrijanom Wardzynskim te lokalnim ekonomistom Adrijanom Musićem, a na temu rada Odjeljenja registra za upis pravnih lica. Sastanku su prisustvovali i Damir Batotić, predsjednik suda, sudija Ramiza Aganović, predsjednica Odjeljenja registra za upis pravnih lica te Mirzet Sudžuka, šef Sektora sudske uprave.

Razmijenjena su iskustva o procedurama registracije poslovnih subjekata, govorilo se o saradnji sa drugim organima i institucijama u postupku registracije te saznanji-

ma o eventualnim zloupotrebama u finasijskom poslovanju pravnih lica. Predstavnici MMF-a su upoznati sa postupkom registracije koji se primjenjuje u Općinskom sudu u Sarajevu, a koji se primjenjuje ujedno i u svim sudovima u FBiH, uz napomenu da je elektronska knjiga registra javna knjiga i da su informacije koje se upisuju u sudski registar dostupne na web stranici suda i stranici BIZreg.ba. Predstavnici MMF su se zahvalili na prijemu te istakli da će im prezentovane informacije bitni od velike koristi u daljem radu. ■



Za predstavnike medija organizovan „Dan otvorenih vrata Općinskog suda u Sarajevu“



U Multimedijalnoj sali Općinskog suda u Sarajevu 17. maja 2023. godine za predstavnike medija organizovan je događaj pod nazivom „Dan otvorenih vrata Općinskog suda u Sarajevu“, a na temu krivičnog postupka i rada Krivičnog odjeljenja ovog suda.

Prisutnim su se ovom prilikom obratili sudija Denis Kurtović, predsjednik Krivičnog odjeljenja te sutkinje Jasmina Sazdovski i Belma Čano Sejfović koje također su de u krivičnim predmetima. Osim predstavljanja nadležnosti Krivičnog odjeljenja i kratkog izvještaja o radu tokom 2022. godine, sudije su pojasnile i najvažnije pojmove krivičnog postupka i instituta krivičnog prava, a razgovarano je i o važnosti pravovremenog i objektivnog izvještavanja o krivičnim

postupcima koji se vode pred ovim sudom.

Poseban akcenat je bio na predmetima koji su u fazi istrage te je skrenuta pažnja da je izuzetno bitno da je istraga tajna te da nije od javnog interesa objavljivanje informacija iz istrage, a koje predstavnici medija često dobiju iz neslužbenih izvora, jer isto može utjecati na tok i ishod istražnog postupka.

Sudije su naglasile da novinari trebaju biti posebno oprezni kada je riječ o informisanju javnosti o krivičnim predmetima koji su zatvoreni za javnost kao i predmetima u kojima se sudi maloljetnicima ili u kojima su oštećeni maloljetnici i djeca. Istaknuto je i da je od izuzetne važnosti ispravno koristiti pravnu terminologiju u skladu sa zakonom i shodno fazi krivičnog

postupka.

Krivično odjeljenje sa 13 sudija u protekloj 2022. godini donijelo je 1.072 osuđujuće presude i deset oslobađajućih, a najviše se radi o predmetima koji se odnose na krivična djela nasilničko ponašanje, razbojništvo, teške krađe, neovlaštena proizvodnja i stavljanje u promet opojnih droga, zloupotreba položaja, nasilje u porodici..

Primarni cilj organizovanja događaja pod nazivom „Dan otvorenih vrata Općinskog suda u Sarajevu“ bio je upoznati predstavnike medija sa radom i nadležnostima Krivičnog odjeljenja, tokom i ishodom krivičnog postupka, kaznenom politikom te ukazati na najčešće pogreške prilikom izvještavanja iz sudnica. ■





Održan sastanak sa predstavnicima Zavoda za informatiku i statistiku Kantona Sarajevo



U okviru projekata i planova Zavoda za informatiku i statistiku Kantona Sarajevo koji se odnose na digitalizaciju i digitalnu transformaciju organa uprave Kantona Sarajevo, u Kabinetu predsjednika Općinskog suda u Sarajevu je 20. aprila 2023. godine održan sastanak na temu di-

gitalnih (elektronskih) dokumenata, digitalnih potpisa i digitalne (online) komunikacije u smislu njihove pravne valjanosti.

Damir Batotić, predsjednik suda, razgovarao je sa predstavnicima Zavoda o trenutnim aktivnostima koje se provode na digitalizaciji javne

uprave kroz uvođenje elektronskog potpisa u dokumente koji se razmjenjuju između institucija Kantona Sarajevo.

Učesnici sastanka su se složili da bi se korištenjem savremenih informacionih tehnologija znatno ubrzalo razmjenjivanje podataka i međusobno službeno komuniciranje institucija u Kantonu Sarajevo, ali i komuniciranje građana prema institucijama Kantona.

Predstavnici obje institucije su tokom sastanka zaključili da je kao preduslov za digitalizaciju i digitalnu transformaciju organa uprave Kantona Sarajevo nepochodno najprije izvršiti izmjenu određene zakonske regulative. ■




▲ Predstavnicima Zavoda za informatiku i statistiku KS



Predsjednik Općinskog suda u Sarajevu u posjeti pravosudnim institucijama Kraljevine Holandije

U periodu od 23. do 28. aprila 2023. godine predsjednik Općinskog suda u Sarajevu Damir Batočić je zajedno sa glavnom kantonalnom tužiteljicom Kantonalnog tužilaštva Kantona Sarajevo Sabinom Sarajlijom te sutkinjom Kantonalnog suda u Sarajevu Melikom Murtezić boravio u studijskoj posjeti pravosudnim institucijama Kraljevine Holandije. Tokom posjete članovi delegacije su imali priliku posjetiti osnovne sudove u Bredi i Amsterdamu te državno tužilaštvo u Amsterdamu gdje su se upoznali sa funkcionisanjem pravosudnog sistema u Kraljevini Holandiji.



Ovom prilikom su sa domaćinima razmijenjena iskustva u vezi sa organizacijom suđenja u krivičnim predmetima. Iskustva koja su stečena tokom posjete će svakako utjecati na unaprjeđenje međuinstitucionalne saradnje suda i tužilaštva kada je u pitanju organizacija samih sudskih postupaka u krivičnoj oblasti, a posebno kada se radi o složenim postupcima i postupcima sa većim brojem optuženih.

U okviru posjete Osnovnom sudu u Bredi, predsjednik Općinskog suda u Sarajevu je zajedno sa domaćinima razgovarao i o mogućnostima buduće saradnje između ova dva

suda za koju inicijalno postoji obostrana saglasnost i želja za realizacijom iste, a što će svakako zavisiti od donatorskih sredstava.

Organizaciju ove studijske posjete podržali su Misija USAID BiH te CILC (Center for International Legal Cooperation) iz Kraljevine Holandije čije su prostorije u Hagu članovi delegacije također imali priliku posjetiti i sa domaćinima obaviti konstruktivan razgovor na temu unaprjeđenja sudskih postupaka u oblasti krivičnog prava. Naposljetku, članovi delegacije su iskazali zahvalnost gospođi Gorani Žagovec Kustura (USAID-ov projekat "Pravosuđe protiv korupcije"), gospođi Saskia de Vries te gospodinu Kenanu Hendi (CILC) na organizaciji i realizaciji posjete. ■

Predstavnicima Vlade KS i pravosuđa dogovarali kako unaprijediti naplatu komunalnih usluga


Predstavnicima Ministarstva pravde i uprave, Ministarstva komunalne privrede, infrastrukture, prostornog uređenja, građenja i zaštite okoliša, Ministarstva za rad, socijalnu politiku, raseljena lica i izbjeglice Kantona Sarajevo te Visokog sudskog i tužilačkog vijeća i Općinskog suda u Sarajevu održali su sastanak s ciljem revidiranja Akcionog plana Vlade KS iz 2017. godine o mjerama i aktivnostima za unapređenje naplate komunalnih usluga.

Općinski sud u Sarajevu je iznimno opterećen velikim brojem neriješenih sudskih predmeta zbog naplate računa javnih preduzeća, a koji čine više od 95 posto svih predmeta na izvršnom odjeljenju.

Rješavanje ovog dugogodišnjeg problema koji crpi brojne resurse i

sredstva, a koja nerijetko premašuju iznos potraživanja, zahtjeva koordiniran i interresorni pristup, zbog čega je 2017. godine izrađen Akcioni plan koji sadrži 51 mjeru, od čega je u proteklom periodu manji broj realiziran. Sastanak je održan s ciljem sagledavanja postignutih učinaka na temelju navedenog plana te njegove revizije i određivanja prioriteta između mjera, kako bi se u što kraćem periodu u ovoj oblasti postigao dodatni pomak.

Kao jedan od osnovnih prioriteta identificirana je potreba ažuriranja baza pri komunalnim preduzećima o naplaćenim uslugama, kako



bi se spriječilo da se na sudu formiraju predmeti za naplatu potraživanja koja su dužnici u međuvremenu dobrovoljno izmirili.

Istaknuta je potreba osiguranja prostora u koji bi se mogli smjestiti oduzeti predmeti, te vršiti njihova prodaja. Određen je rok od 15 dana za reviziju Akcionog plana, koji će ponovo biti upućen Vladi Kantona Sarajevo na usvajanje.

Također je usaglašen mehanizam koordinacije i praćenja izvršenja mjera iz Akcionog plana, kroz redovne sastanke i sistem praćenja implementacije usaglašenih mjera. ■



Uskoro implementacija Sistema za integrisanu i elektronsku registraciju poslovnih subjekata u Općinskom sudu u Sarajevu

U Kabinetu predsjednika Općinskog suda u Sarajevu 06.03.2023. godine je održan sastanak na temu implementacije Sistema za integrisanu i elektronsku registraciju poslovnih subjekata u Federaciji BiH. Sastanku su ispred IFC Međunarodna finansijska korporacija - LIFE Projekta, prisustvovali Senka Eminagić Vranić, voditelj projekta i Sadik Crnovršanin, IT ekspert. Riječ je o dugogodišnjem reformskom procesu ostvarenom kroz Projekat poboljšanja poslovnog okruženja "LIFE" koji provodi Međunarodna finansijska korporacija (IFC), članica Grupacije Svjetske banke, a finansira Britanska ambasada u Bosni i Hercegovini. Na navedenom sastanku predstavnici Općinskog suda u Sarajevu su obavješteni da je Vlada FBiH dala saglasnost na Prijedlog Ugovora o

saradnji između Vlade FBiH i Međunarodne finansijske korporacije (Odluka objavljena u Sl. novinama FBiH broj 81/22), a saglasnost je prvi korak u implementaciji navedenog sistema. Također odabran je Izvođač radova - društvo QSS d.o.o. Sarajevo, koje će biti zaduženo za apliciranje programa za online registraciju poslovnih subjekata u Registru Općinskog suda u Sarajevu.

Predstavnici IFC Međunarodna finansijska korporacija - LIFE Projekta su ukazali da je u okviru realizacije Projekta planirano, između ostalog, povezivanje sa Poreskom upravom FBiH, automatska dodjela predmeta sudijama u rad i podešavanje koeficijenta dodjele, olakšano izdavanje historijskih izvoda i dr. Također prisutni predstavnici su ukazali da je implementacija Si-

stema već započela u Općinskom sudu u Travniku te se početak implementacije u sarajevskom Općinskom sudu očekuje u što skorije vrijeme.

Kao najveći sud u regiji, u kojem se prema određenim evidencijama obavlja oko 40-45% svih registarskih poslova u Federaciji BiH, te i dalje radi po sistemu manuelnog uvida u arhivu spisa, Općinski sud u Sarajevu je izrazio veliku zainteresiranost za konačno okončanje započetog Projekta.

Ispred Općinskog suda u Sarajevu sastanku su prisustvovali Damir Batotić, predsjednik suda, Ramića Aganović, predsjednica Odjeljenja registra za upis pravnih lica, Sumeja Buko, šef Kabineta, Mirzet Sudžuka, šef Sektora sudske uprave te Elvir Kurić, šef IKT odsjeka. ■





Građanima olakšan pristup Zemljišnoknjižnom uredu

Općinski sud u Sarajevu, kao najveći sud u Bosni i Hercegovini i jedan od najvećih u široj regiji, danas se susreće sa brojnim problemima koji su izazvali otežano funkcionisanje u svim segmentima njegovog djelovanja. Kao jedan od problema koji značajno utječe na negativnu percepciju javnosti kada je u pitanju rad suda, svakako su i kolone građana koji ispred Zk ureda čekaju u redovima kako bi ostvarili svoja prava.

Uprava suda je prepoznala navedeni problem te je u cilju rješavanja istog uspostavljeno novo radno vrijeme u šalter sali Zk ureda, a što je svakako rezultiralo sprječavanjem formiranja redova građana koji su u jutarnjim satima čekali ispred šalter sale.

Pozitivni efekti ovakve odluke su odmah uočeni te Uprava suda ovom prilikom iskazuje zahvalnost i Vladi Kantona Sarajevo koja je prepoznala ovaj problem kao prioritetan te je na prijedlog suda dala i saglasnost za prijem četiri zaposlenika za rad sa strankama u šalter-sali Zk ureda, a čime su stvorene pretpostavke za još efikasniji rad istog. Također, u prethodnom periodu Damir Batotić, predsjednik suda,

održao je sastanak sa premijerom Kantona Sarajevo, ministricom Ministarstva pravde i uprave Kantona Sarajevo te ministrom finansija Kantona Sarajevo, a u vezi sa dugogodišnjim problemom naplate sudske takse izvan sjedišta suda. Riječ je o dva kioska pravnog lica „E-novine“ koji se nalaze stotinjak metara od šalter-sale Zk ureda. U tom pravcu, obzirom da je sistem naplate sudske takse u nadležnosti Ministarstva finansija Kantona Sarajevo, nakon konstruktivnog razgovora tokom kojeg su premijer i ministri iskazali veliko razumijevanje za rješavanje ovog problema, predsjednik suda je uputio inicijativu Vladi KS sa konkretnim prijedlozima kako bi se konačno riješio dugogodišnji problem sa kojim se susreću građani, a to je kupovine sudske takse van zgrade suda. Shodno navedenom te dosadašnjem iskazanom razumijevanju Vlade KS za rješavanje problema sa kojima se sud susreće, Uprava suda očekuje da će ova inicijativa u narednom periodu biti prihvaćena od strane Vlade KS, čime bi građanima bio olakšan i ubrzan pristup sudu prilikom ostvarivanja njihovih prava.

Naposlijetku, rezultat navedenih, preduzetih organizacionih mjera u radu Zk ureda su pozitivni pokazatelji prema kojima su u mjesecu maju 2023. godine zaposlenici ovog ureda ostvarili zavidne rezultate te ne samo da je savladan priliv predmeta za taj mjesec već je broj i neriješenih predmeta značajno smanjen (sa 1.060 predmeta u radu na početku mjeseca broj predmeta je smanjen na 825 predmeta te je izdato 12.514 zk izvadaka i različitih uvjerenja po osnovu kojih je sud naplatio 124.321,00 KM sudske takse).

Navedeni pokazatelji posebno dobivaju na značaju kada se ima u vidu činjenica da je rad u Zk uredu tokom mjeseca maja 2023. godine bio potpuno obustavljen u dva navrata zbog lažnih dojava o postavljenim minsko-eksplozivnim napravama.

Ovakvi rezultati uposlenika Zk ureda suda su svakako za pohvalu te javnost treba biti upoznata sa njihovim naporima da građanima ubrzaju i olakšaju ostvarivanje prava iz nadležnosti Zemljišnoknjižnog ureda. ■



Zbog sve češćih lažnih dojava o postavljenim minsko-eksplozivnim napravama rad Općinskog suda u Sarajevu ozbiljno ugrožen

Općinski sud u Sarajevu se već duži period susreće sa problemom anonimnih dojava o postavljenim minsko-eksplozivnim napravama u zgradi suda. Pri tome se svaki put potpuno obustavlja rad suda do okončanja kontra-diverzionog pregleda prostorija, uposlenici su primorani napustiti radna mjesta, otkazuje se veliki broj ročišta, a što u konačnici ima nesagledive posljedice na rezultate rada suda, ostvarenu normu sudija, ali i na materijalne izdatke kako suda tako i stranaka u postupku.

Samo tokom 2022. godine ovaj sud zaprimio je čak 14 lažnih dojava o postavljenim minsko-eksplozivnim napravama, a odgođeno je čak 2.047 ročišta.

Trend lažnih dojava nastavljen je i u 2023. godini i to:

- 24.01.2023. godin kada je odgođeno 137 ročišta,
- 31.01.2023. godine kada je odgođeno 170 ročišta,
- 01.02.2023. godine kada je odgođeno 93 ročišta,
- 14.03.2023. godine kada je odgođeno 108 ročišta,

- 21.03.2023. godine kada je odgođeno 115 ročišta,
- 28.03.2023. godine kada je odgođeno 97 ročišta,
- 25.04.2023. godine kada je odgođeno 138 ročišta,
- 26.04.2023. godine kada je odgođeno 191 ročište,
- 27.04.2023. godine kada je odgođeno 58 ročišta,
- 23.05.2023. godine kada je odgođeno 132 ročišta.

Dakle, u periodu **01.01.2023. godine do 23.05.2023. godine, zbog 10 lažnih dojava o postavljenim minsko-eksplozivnim napravama, u ovom sudu je ukupno odgođeno 1.239 ročišta.** Tome treba dodati i veći broj stranaka koje su bile uskraćene za usluge u Zemljišnoknjižnom uredu, Odjeljenju registra za upis pravnih lica te ostalim službama u okviru ovog suda, kao i stranke koje nisu mogle pristupiti ročištima, a došle su iz drugih kantona ili čak drugih država. Bitno je napomenuti i činjenicu da je odgodom ovolikih broja ročišta učinjena i velika materijalna šteta Kantonu

Sarajevo.

Ova negativna pojava svakako utječe na rezultate rada sudija, sudskih odjeljenja kao i suda u cjelini te je prostim računanjem, kada se uzme u obzir da prosječno trajanje kontradiverzionog pregleda iznosi od 3 i po do 4 sata, jasno da su uposlenici ovog suda u 2022. godini zbog lažnih dojava bili odsutni sa posla 7 radnih dana (14 dojava). Identičan trend nastavljen je i u ovoj godini kada su uposlenici ovog suda od početka ove godine do danas radile 5 radnih dana manje (10 dojava).

S obzirom da su anonimne dojavae o postavljenim minsko-eksplozivnim napravama u pravosudnim institucijama u posljednje vrijeme jako učestale te da znatno utječu na rad i normalno funkcionisanje pravosudnih institucija u Kantonu, na efikasnost pravosuđa u cjelini, ali i na percepciju javnosti o pravosuđu, iskreno se nadamo da će nadležni organi u što skorije vrijeme poduzeti sve aktivnosti s ciljem iznalaženja konačnog rješenja problema anonimnih dojava. ■

Sudija Denis Kurtović za Oslobođenje: Visoka korupcija je prioritet

Sudija Denis Kurtović za Oslobođenje kaže da Općinski sud u Sarajevu radi na 62 koruptivna predmeta, od čega je sedam predmeta visoke korupcije

U proteklih nešto više od godinu Krivično odjeljenje Općinskog suda u Sarajevu donijelo je 1.072 osuđujuće presude i svega devet oslobađajućih. Denis Kurtović, predsjednik ovog odjeljenja, kaže da ono broji 12 sudija, a što je, smatra, dovoljno da se u zakonskim rokovima postupa po svim predmetima i obavljaju blagovremeno svi zadaci.

Teške krađe

- Krivično odjeljenje je jedno od ažurnijih odjeljenja Suda, a kada je riječ o kvalitetu, ima čak 90% potvrđenih odluka po žalbi. Kada je u pitanju kvalitet odluka, u tom pravcu intencija nam je da se taj procenat dodatno popravi, govori Kurtović za naš list.

Dodaje da ovo odjeljenje trenutno ima 1.200 neriješenih predmeta u radu koji se odnose na razne faze krivičnog postupka - istrage, potvrđene optužnice i glavne pretrese, odnosno suđenja, te da se najčešća krivična djela tiču posjedovanja i omogućavanja uživanja opojnih droga, teških krađa, krađa...

- Tu su i krivična djela protiv života i tijela. U posljednje vrijeme uočeno je povećanje broja krivičnih predmeta koji se odnose na krivična djela nasilje u porodici i bludne radnje. Ovo odjeljenje trenutno u radu ima i 62 neriješena koruptiv-

na predmeta u raznim fazama, od čega je sedam predmeta visoke korupcije. Ti predmeti imaju prioritet i sudije Krivičnog odjeljenja iskazuju veliku posvećenost njihovom rješavanju, ističe.

Iako se često kao jedan od velikih problema našeg pravosudnog sistema navodi predugo trajanje sudskih postupaka, naš sagovornik kaže da na Općinskom sudu u Sarajevu većina krivičnih predmeta bude riješena u roku od jedne godine.

- A što je dosta brzo i efikasno. Izuzetak su dva-tri krivična predmeta čije rješavanje traje nešto duže, što je uzrokovano objektivnim razlozima poput velikog broja svjedoka i ostalih dokaznih prijedloga, kako optužbe tako i odbrane, ali i sve češćim ometanjima rada Suda zbog anonimnih dojava o postavljenim minsko-eksplozivnim napravama u zgradi Suda, ističe.

Općinski sud u Sarajevu organizovao je prošle sedmice Dan otvorenih vrata za novinare, kada su sudije također ukazale na to da im dojava o postavljenim bombama predstavljaju veliki problem.

- Nenormalno je velik broj izgubljenih ročišta, enormni troškovi nastaju i za Sud i za stranke koje recimo dolaze ovdje, nisu iz Sarajeva, pa stoje tu, čekaju... Predsjednik Suda poduzima sve što može u komunikaciji sa istražnim organima da se otkriju i procesuiraju počinioci. Prošle godine je 14 puta dojavljena bomba, a ove godine, mislim da smo već premašili taj broj, rekla je sutkinja



Belma Čano Sejfović.

Božo Mihajlović, suspendovani tužilac Tužilaštva Bosne i Hercegovine, tereti se da je propustio vršiti nadzor nad radom i postupanjem svoje daktilografkinje, koja je prisvojila privremeno oduzeti novac iz više predmeta u iznosu većem od 100.000 KM. Njemu je prvobitno suđeno pred Sudom BiH, gdje je osuđen na pet godina zatvora, ali je Apelaciono vijeće krajem 2020. ukinulo presudu i postupak prenijelo na Općinski sud u Sarajevu.

60 svjedoka

- Radi se o složenom predmetu sa velikim brojem svjedoka, čak oko 60 svjedoka optužbe, uz napomenu da je do sada saslušano blizu polovine tog broja, a do kraja godine bi se mogli izvesti dokazi optužbe, kaže.

Sudiju Kurtovića smo pitali i nedostaje li nosiocima pravosudnih funkcija etike s obzirom na to da svake godine Ured disciplinskog tužioca bilježi povećan broj primljenih pritužbi.

- Kada je riječ o Krivičnom odjeljenju ovog suda, u posljednjih sedam godina izrečena je samo jedna mjera, mjera javne opomene, a što je ujedno i najblaža predviđena mjera, odgovorio je. ■



USAID-ov Projekat „Pravosuđe protiv korupcije u BiH“ nastavlja pružati podršku Općinskom sudu u Sarajevu

Sastanak u sklopu USAID-ovog projekta “Pravosuđe protiv korupcije”, na temu planiranih aktivnosti koje će se provesti u narednom periodu, a koje se odnose i na Općinski sud u Sarajevu kao partnersku instituciju u okviru navedenog Projekta, održan je u Kabinetu predsjednika suda 27.02.2022. godine. Ispred USAID Projekta sastanku su prisustvovali Biljana Potparić Lipa, direktorica projekta, Sanela Paripović, voditeljica Komponente 1 - Unaprjeđenje rada pravosudnih institucija na složenim predmetima korupcije i organizovanog kriminala visokog nivoa te Muhamed Sušić, rukovodilac Komponente 2 - Prevencija korupcije u pravosudnom sektoru u BiH. Imenovani su ukratko izložili pla-



USAID
FROM THE AMERICAN PEOPLE

nirane aktivnosti u narednom periodu i to u okviru Komponente 1: specijalizirane obuke za sudije (posebno za sudije koje rade koruptivne predmete), međuinstitucionalni sastanci, pitanje harmonizacije sudske prakse, transparentnosti u radu na predmetima koji su od značajnog interesa za građane te statusne konferencije.

U okviru Komponente 2, a obzi-

rom da je pojava korupcije u sudovima i tužilaštvima vezana i za rad stručnog i drugog osoblja u sudovima i tužilaštvima, Projekt je razvio Model etičkog kodeksa i smjernica za postupanje uposlenika u pravosudnim institucijama u BiH, koji je usvojen od strane VSTV-a BiH, te su u smislu navedenog planirane obuke u ovoj oblasti za sve partnerske institucije u pravcu poboljšanja institucionalnog integriteta pravosudnog sistema i uvođenja mehanizama koji učinkovito sprječavaju koruptivno ponašanje. Projekt također pruža punu podršku u radu koordinatorima za implementaciju planova integriteta u partnerskim institucijama te su planirane obuke na temu javnih istupa i korištenja društvenih mreža. ■

Uposlenici Općinskog suda u Sarajevu učestvovali u akciji dobrovoljnog darivanja krvi

U prostorijama Općinskog suda u Sarajevu 05. septembra 2023. godine uspješno je realizovana akcija dobrovoljnog darivanja krvi. Akciju je organizovao Zavod za transfuzijsku medicinu u FBiH, a istoj se odazvao veliki broj uposlenika suda kao i pripadnika Sudske policije u FBiH.

Predstavnici Zavoda izrazili su zahvalnost Općinskom sudu u Sarajevu za učešće u akciji, kao i zaposlenicima koju su dobrovoljno dali krv te na taj način pokazali humanost i spremnost da pomognu onima kojima je krv neophodna. ■





Putem QR kodova do potrebnih informacija iz nadležnosti Odjeljenja registra za upis pravnih lica

Općinski sud u Sarajevu nastavlja sa unapređenjem rada Odjeljenja registra za upis pravnih lica, a sve sa ciljem kako bismo strankama olakšali pristup informacijama iz nadležnosti Registra. Od sada stranke i putem mobilnih telefona, skeniranjem QR kodova koji su istaknuti na šalteru pisarnice Registra, mogu doći do informacija o statusu svog predmeta, uvjerenjima koja su im potrebna kao i potrebnoj dokumentaciji za osnivanje i promjene kod poslovnih subjekata (d.o.o. i d.d.).

Na ovaj način stranke mogu brzo i jednostavno doći do potrebne informacije na jednom mjestu. ■



Strankama omogućeno online praćenje rješavanja Reg predmeta u Odjeljenju za upis u registar pravnih lica

Od 25. septembra 2023. godine, strankama je omogućeno online praćenje rješavanja registarskih predmeta putem elektronskog upisnika, a koji je dostupan putem linka <https://oss.ba/index.php/registar-status-predmeta>. Naime, u cilju omogućavanja lakšeg pristupa strankama sudu, odlukom Uprave suda, stranke će uspostavom elektronskog upisnika moći pratiti status svoga predmeta.

Elektronski upisnik sadrži sljedeće podatke: broj pod kojim je predmet zaprimljen, datum kada je sudiji dodijeljen u rad, datum ukoliko postoji zaključak, datum kada je rješenje završeno te visinu sudske takse i napomenu (ukoliko ista postoji). U elektronskom upisniku će se moći vidjeti samo oni predmeti koji su u radu. Bitno je istaći da je elektronski upisnik privremeno rješenje s obzirom da će za nekoliko mjeseci stupiti na snagu upotreba novog softvera za Registar. ■

Odjeljenje Registra za upis pravnih lica - Oglasna ploča

Registar - status predmeta

Broj predmeta	Podnosilac prijave	Datum prijave predmeta	Priglasio	Stupe	Datum dodjeljenja u radu	Zaključak	Ukupna suma	Datum odlučivanja	Ukupna suma	Priglasio	Stupe
100-0-Reg-100000	Stranica d.o.o.	22.09.2023	Priglasio	00	04.10.2023		00.00.000	01.10.2023	00		
100-0-Reg-100001	Stranica d.o.o.	22.09.2023	Priglasio	00	04.10.2023		00.00.000	01.10.2023	00		
100-0-Reg-100002	Stranica d.o.o.	22.09.2023	Priglasio	00	04.10.2023		00.00.000	01.10.2023	00		
100-0-Reg-100003	Stranica d.o.o.	22.09.2023	Priglasio	00	04.10.2023		00.00.000	01.10.2023	00		
100-0-Reg-100004	Stranica d.o.o.	22.09.2023	Priglasio	00	04.10.2023		00.00.000	01.10.2023	00		
100-0-Reg-100005	Stranica d.o.o.	22.09.2023	Priglasio	00	04.10.2023		00.00.000	01.10.2023	00		
100-0-Reg-100006	Stranica d.o.o.	22.09.2023	Priglasio	00	04.10.2023		00.00.000	01.10.2023	00		
100-0-Reg-100007	Stranica d.o.o.	22.09.2023	Priglasio	00	04.10.2023		00.00.000	01.10.2023	00		
100-0-Reg-100008	Stranica d.o.o.	22.09.2023	Priglasio	00	04.10.2023		00.00.000	01.10.2023	00		
100-0-Reg-100009	Stranica d.o.o.	22.09.2023	Priglasio	00	04.10.2023		00.00.000	01.10.2023	00		
100-0-Reg-100010	Stranica d.o.o.	22.09.2023	Priglasio	00	04.10.2023		00.00.000	01.10.2023	00		
100-0-Reg-100011	Stranica d.o.o.	22.09.2023	Priglasio	00	04.10.2023		00.00.000	01.10.2023	00		
100-0-Reg-100012	Stranica d.o.o.	22.09.2023	Priglasio	00	04.10.2023		00.00.000	01.10.2023	00		
100-0-Reg-100013	Stranica d.o.o.	22.09.2023	Priglasio	00	04.10.2023		00.00.000	01.10.2023	00		
100-0-Reg-100014	Stranica d.o.o.	22.09.2023	Priglasio	00	04.10.2023		00.00.000	01.10.2023	00		
100-0-Reg-100015	Stranica d.o.o.	22.09.2023	Priglasio	00	04.10.2023		00.00.000	01.10.2023	00		
100-0-Reg-100016	Stranica d.o.o.	22.09.2023	Priglasio	00	04.10.2023		00.00.000	01.10.2023	00		
100-0-Reg-100017	Stranica d.o.o.	22.09.2023	Priglasio	00	04.10.2023		00.00.000	01.10.2023	00		
100-0-Reg-100018	Stranica d.o.o.	22.09.2023	Priglasio	00	04.10.2023		00.00.000	01.10.2023	00		
100-0-Reg-100019	Stranica d.o.o.	22.09.2023	Priglasio	00	04.10.2023		00.00.000	01.10.2023	00		
100-0-Reg-100020	Stranica d.o.o.	22.09.2023	Priglasio	00	04.10.2023		00.00.000	01.10.2023	00		

Općinski sud u Sarajevu

